



Huruma Yake

Akawakumbatia, akaweka mikono yake juu yao, akawabarikia.—Marko 10:16.

Wakati Yesu alipokuwa akihudumu katika mitaa ya miji, akina mama wakiwa na watoto wao wagonjwa na wanaokaribia kufa mikononi mwao wanajipenyeza katika kusanyiko, wakitafuta kufika mahali Atakapowaona.

Tazama akina mama hawa, dhaifu, wamechoka, wanaokaribia kukata tamaa, lakini wakiwa wamedhamiria na kuvumilia. Wakibeba mzigo wao wa mateso, wanamtafuta Mwokozi. Wanaposhindwa kwa sababu ya umati unaowazonga, Yesu anaonekana kuja kuelekea kwao hatua kwa hatua, mpaka Anapokuwa amewakaribia. Matumaini yanachipuka miyoni mwao. Machozi yao ya furaha hudondoka wanapopata usikivu Wake, na kuwatazama machoni akionesha huruma ya upendo.

Akimchagua mmoja wao, Mwokozi anaamsha imani yake, akisema, “Wataka nikufanyie nini?” Anasema hitaji lake kwa kwikwi, “Bwana, naomba umponye mwanangu.” Yesu anamchukua mtoto mdogo mikononi mwake, na ugonjwa unatoweka kwa mguso Wake. Ugonjwa wa kufisha unatoweka; mkondo utoao uzima unatiririka kwenye vena na misuli inapokea nguvu. Maneno ya faraja na amani hutamkwa kwa mamaye; na kisha kesi nyingine, kama ya dharura, inawasilishwa. Tena Kristo anatumia uweza Wake wa kuhuisha, na wote wanamwambia sifa na heshima Yeye afanyaye mambo ya ajabu.

Tunazungumza sana juu ya ukuu wa maisha ya Yesu. Tunazungumza juu ya mambo ya ajabu ambayo Yeye alitimiza, ya miujiza ambayo Aliifanya. Lakini kushughulika Kwake na mambo yanayohesabiwa kuwa madogo ni uthibitisho wa juu zaidi wa ukuu Wake.

Miongoni mwa Wayahudi ilikuwa ni desturi ya watoto kuletwa kwa rabi fulani, ili aweke mikono yake juu yao kwa baraka; lakini wanafunzi walifikiri kazi ya Mwokozi ni muhimu sana kuweza kuingiliwa kwa njia hii. Wakati akina mama walipokuja wakitaka Yesu awabariki watoto wao wadogo, wanafunzi waliwatazama kwa chuki. Walifikiri watoto hawa walikuwa wachanga sana kunufaika kwa kumwendea Yesu, na wakahitimisha kwamba angechukizwa na uwepo wao. Lakini Mwokozi alielewa mahangaiko na mzigo wa akina mama ambao walikuwa wakitafuta kuwafundisha watoto wao kulingana na Neno la Mungu. Alikuwa amesikia maombi yao. Yeye Mwenyewe alikuwa amewavuta katika uwepo Wake....

Leo Yesu ni Mwokozi mwenye huruma kama Alivyokuwa akitembea miongoni mwa wanadamu. Kwa kweli ni msaidizi wa akina mama sasa kama vile alivyowakusanya watoto mikononi Mwake huko Yudea. Watoto wa nyumbani kwetu wamenunuliwa kwa damu Yake kama vile watoto wa zamani

Hebu akina mama wamjie Yesu wakiwa na fadhaa zao. Watapata neema itoshayo kuwasaidia katika utunzaji wa watoto wao. Malango yamefunguliwa kwa kila mama ambaye ataweka mizigo yake miguuni pa Mwokozi. Yeye aliyesema, “Waacheni watoto wadogo waje kwangu, wala msiwazuie” (Marko 10:14), bado anawaalika akina mama kuwaleta watoto wao ili awabariki (The Ministry of Healing, 38-42).